



O alumando do colexio Santo Tomás de Porriño visitou este centro singular da Universidade.

DESCUBRINDO A INVESTIGACIÓN DE PRIMEIRA MAN E CON MULLERES COMO PROTAGONISTAS

DUVI 01/10/2019

Como parte da xornada *Un día no Cinbio. Rompendo teitos de cristal*, 25 estudantes de 6º de primaria do colexio Santo Tomás de Porriño participaron nunha visita ás instalacións do Centro de Investigacións Biomédicas (Cinbio). Os alumnos e alumnas puideron converterse investigadores e investigadoras durante unhas horas descubrindo en que se está a traballar e realizando varias actividades en diferentes laboratorios. [+info.](#)



Un intre da intervención de Pedro Campoy no salón de actos da Ecimat.

UNHA NOVA SESIÓN DO CICLO CAFÉ CON SAL AFONDA NOS EFECTOS DAS AUGAS RESIDUAIS SOBRE O OURIZO DE MAR

DUVI 01/10/2019

Como afecta a contaminación derivada das augas residuais urbanas aos organismos mariños e, máis concretamente, aos ourizos de mar? Esta foi a pregunta a que este martes tratou de responder o investigador do [Grupo de Ecoloxía Costeira, EcoCost](#), CIM-UVigo, Pedro Campoy nunha nova charla do ciclo de conferencias [Café con Sal](#). [+info.](#)



Imaxe de grupo das e dos participantes.

ESPECIALISTAS DE SETE PAÍSES AFONDAN NOS ÚLTIMOS AVANCES CIENTÍFICOS EN COMPOSTOS FENÓLICOS

DUVI OURENSE 02/10/2019

A Facultade de Ciencias do campus de Ourense acolleu este mércores a celebración do [I Congreso Ibérico de Compostos Fenólicos](#), organizado polo Grupo de Investigacións Agroambientais e Alimentarias da Universidade de Vigo. A cita reuniu aos grupos de referencia na investigación sobre compostos fenólicos de España e Portugal e a arredor de 100 investigadores e investigadoras de sete países e contou con 50 comunicacións sobre os últimos avances neste eido. [+info.](#)



As profesoras de Dereito do traballo e da Seguridade Social Nora M^a Martínez e Emma Rodríguez, organizadoras da xornada.

EXPERTAS E TRABALLADORAS ANALIZARÁN A SITUACIÓN LABORAL DAS MULLERES NA PESCA E OS OFICIOS MÁIS FEMINIZADOS

DUVI 02/10/2019

As mulleres traballadoras da pesca en Galicia sofren unha dobre segregación: por unha banda, hai unha división entre oficios masculinos, normalmente vinculados aos barcos, e outros femininos, xeralmente de ribeira, e estes últimos son os peor pagados e con peores condicións laborais. Para analizar esta división horizontal e vertical na pesca dende o punto de vista xurídico-laboral, unha xornada reunirá no campus de Vigo especialistas internacionais e representantes de diferentes colectivos, dende redeiras ata mariscadoras ou mesmo unha das poucas patroas de altura que existen en Galicia. [+info](#).



Manuel Reigosa, Julio Abalde e Enrique A. Fernández.

A CÁTEDRA ALDABA FOMENTARÁ A PARTICIPACIÓN DAS MULLERES NAS TIC

DUVI OURENSE 02/10/2019

Potenciar e enriquecer o progreso das TIC promocionando unha crecente participación das mulleres no seu desenvolvemento e establecendo canais bidireccionais de colaboración entre a universidade e a empresa. Con este dobre obxectivo presentouse este mércores a Cátedra Aldaba WIB: Women, ICT & Business, que nace froito da colaboración entre as universidades de Vigo e A Coruña e a empresa Aldaba. [+info](#).



A UNIVERSIDADE BUSCA PERSOAS VOLUNTARIAS QUE QUEIRAN CONVERTERSE EN AXENTES DE CAMBIO

DUVI 02/10/2019

A Axenda 2030 de Desenvolvemento Sostible foi aprobada pola Asemblea das Nacións Unidas en 2015 e constitúe unha folla de ruta asinada por 193 países de cara a unha transformación profunda do planeta Terra a través dun crecemento económico inclusivo, unha maior cohesión e xustiza social e un horizonte ambiental sostible. Esta axenda comprende 17 obxectivos de desenvolvemento sostible, coñecidos como ODS, que acompañan de 169 metas que deben inspirar as políticas públicas postas en marcha polas administracións públicas dos estados implicados, incluíndo tamén ás universidades. [+info](#).



Unha sesión impartida por unha mentora ás nenas dun colexio de Vigo.

ASÍ FOMENTA A UNIVERSIDADE QUE AS NENAS SEXAN CIENTÍFICAS E TECNÓLOGAS

M^a DEL CAMEN ECHEVARRÍA DUVI 03/10/2019

“Aprendín que as rapazas podemos facer o mesmo que os rapaces”. “Unha experiencia moi bonita, que te anima a ser científica ou tecnóloga” ou “foi espectacularmente emocionante”. Con estas palabras resumiron algunhas das 122 nenas e 116 nenos de 5º e 6º de Primaria e 1º de Secundaria dos centros Plurilingüe Ramón y Cajal; Santa Cristina; Escultor Acuña e Miralba de Vigo e Cova Terreña de Baiona, a súa participación na primeira edición do programa Inspira STEAM Galicia, posto en marcha pola Universidade de Vigo o pasado curso. [+info](#).



Carolina G. Puig, secretaria do Comité Organizador do congreso e Nuria Pedrol, coordinadora do Comité Organizador.

ESPECIALISTAS DE ESPAÑA, PORTUGAL, REINO UNIDO E EEUU REÚNENSE EN VIGO NO XVII CONGRESO DA SOCIEDAD ESPAÑOLA DE MALHERBOLOGÍA

DUVI 04/10/2019

Preto de 100 especialistas participarán do 8 ao 10 deste mes de outubro no XVII Congreso da de la Sociedad Española de Malherbología (SEMh), un evento organizado polo grupo de investigación da Universidade de Vigo Agrobioloxía ambiental: calidade de solos e plantas, membro da Agrupación Estratéxica Citaca, en colaboración coa Misión Biolóxica de Galicia (CSIC). Trátase dun congreso bianual que nesta edición reunirá a investigadoras e investigadores de toda España, con participantes tamén de Portugal, Reino Unido, e EEUU. [+info](#).



As actividades celebráranse nos edificios de Ferro (na imaxe) e Xurídico-Empresarial.

UNHA OLLADA DE XÉNERO Á ANTIGÜIDADE E Á PRECARIIDADE LABORAL NA ERA DIXITAL

DUVI OURENSE 04/10/2019

Entre a programación de actividades previstas para o mes de outubro nos diferentes centros do campus de Ourense están a *II Xornada olladas á antigüidade*. Mulleres que entreteñen e mulleres que se entreteñen e a xornada *Precariedade da traballadora ante os empregos dixitais atípicos*. As dúas actividades, financiadas pola Unidade de Igualdade da Universidade de Vigo, coinciden en abordar temáticas moi diversas pero ambas desde unha perspectiva de xénero. [+info](#).



COLOQUIO ABERTO CON FERNANDO AGUADO E JUAN PICOS PARA COÑECER A INVESTIGACIÓN DA UVIGO NA LOITA CONTRA O LUME

DUVI 04/10/2019

Con motivo da conmemoración da Semana Mundial do Espazo (do 4 ao 10 outubro), a Unidade de Cultura Científica e da Innovación (UCC+i) da Universidade de Vigo organiza un coloquio no que tentará achegar á sociedade as investigacións realizadas desde a institución académica usando tecnoloxías como satélites, vehículos non tripulados e drones na loita contra o lume, ademais de analizar o sucedido na vaga de incendios de 2017 desde o punto de vista da xestión forestal. [+info](#).

4



Imaxe de grupo co alumnado chegado de Brasil.

DEREITO ESTREITA LAZOS COAS UNIVERSIDADES BRASILEIRAS DE LONDRINA E FLUMINENSE

ROSA TEDÍN DUVI OURENSE 07/10/2019

A Facultade de Dereito do campus de Ourense recibiu estes luns unha delegación de alumnado e profesorado da Universidade Estadual de Londrina, en Paraná, e da Universidade Federal Fluminense, de Río de Janeiro, ambas de Brasil. Trátase dunha decena de persoas que durante 15 días realizarán unha estadía de investigación académica no centro ourensán. [+info](#).



Imaxe de grupo co alumnado chegado de Brasil.

CONVÓCANSE TRES BOLSAS DE FORMACIÓN PRÁCTICA PARA PERSOAS CON DISCAPACIDADE INTELECTUAL

DUVI OURENSE 08/10/2019

A Vicerreitoría do Campus de Ourense convoca un curso e tres [bolsas](#) destinadas a persoas con discapacidade intelectual para a formación práctica nas instalacións universitarias no curso 2019/2020. A iniciativa ten como obxectivo contribuír á formación de mozos e mozas con discapacidade intelectual para que “sexan capaces de desenvolverse en diferentes contextos sociais e laborais de cara a lograr a súa progresiva integración no mercado laboral e acadar así graos de autonomía e independencia persoal”. [+info](#).

Outubro 2019.



A Escola Universitaria de Enfermería acolle un curso de sensibilidade en igualdade.

O ALUMNADO DE ENFERMARÍA FÓRMASE EN IGUALDADE PARA AVALIAR A REALIDADE DESDE UNHA PERSPECTIVA DE XÉNERO

DUVI PONTEVEDRA 08/10/2019

Achegar ás alumnas e alumnos da Escola Universitaria de Enfermería de Pontevedra, centro adscrito á Universidade de Vigo, unha formación inicial respecto do que significa o sistema sexo-xénero, sobre a discriminación das mulleres como un fenómeno estrutural, sobre a violencia machista ou sobre os roles e estereotipos de xénero. Eses son os obxectivos do Curso básico de igualdade entre mulleres e homes e perspectiva de xénero, que a escola organiza coa Deputación de Pontevedra. [+info.](#)



Na edición Tui participaron unha vintena de estudantes senior.

MAREAS DE COÑECEMENTO: A UNIVERSIDADE MÁIS ALÓ DOS CAMPUS E DAS BARREIRAS DE IDADE

DUVI 08/10/2019

Formación durante toda a vida, docencia e divulgación que se estende máis aló dos campus e flexibilidade académica. Estes son os puntos de partida do proxecto Mareas de Coñecemento, unha iniciativa da Universidade de Vigo para expandir as súas actividades formativas á poboación sénior de toda Galicia, unha extensión do Programa de Maiores que pretende chegar máis aló da poboación das cidades nas que se insiren os tres campus. [+info.](#)



Recepción oficial no edificio Miralles.

O CAMPUS DÁ A BENVIDA A 18 ESTUDANTES DE MALAISIA, INDIA, INDONESIA, XORDANIA E CAMBOXA

DUVI 08/10/2019

Malaisia, India, Indonesia, Xordania e Camboxa son os países de procedencia dos 18 estudantes que esta semana comezaron un ano de estadía na Universidade de Vigo. Chegan a Galicia da man do proxecto Campus Spain, unha iniciativa nacida no Porriño que ten como finalidade atraer o alumnado asiático ás universidades españolas para que realicen cursen parte dos seus estudos de grao o posgrao. [+info.](#)



Alumnas e alumno gañadores da anterior edición dos Premios Egeria.

A UNIVERSIDADE PON EN VALOR OS TRABALLOS DE FIN DE GRAO E DE MESTRADO QUE INTEGREN A PERSPECTIVA DE XÉNERO

DUVI 08/10/2019

Pioneira na ruptura de roles e primeira cronista de viaxes galega, Egeria é un exemplo que se busca poñer en valor cunha nova edición dos [Premios Egeria](#), galardóns impulsados pola Unidade de Igualdade da Universidade de Vigo. É a sexta edición duns galardóns que naceron co obxectivo de incentivar a investigación en xénero e nos estudos feministas e recoñecer, divulgar e premiar aos mellores traballos destas características. [+info](#).



No programa participan alumnas e alumnos do Dobre Grao ADE-Dereito e dps graos Economía e ADE.

PRETO DUN CENTO DE ESTUDANTES PARTICIPAN NO CAMPUS NO II MENTOR DAY

D. BESADÍO DUVI 09/10/2019

Preto dun cento de estudantes participaron este mércores no campus no II Mentor Day, unha actividade organizada pola [Fundación Mentor](#), integrada por unha vintena de empresas e bufetes de avogados da cidade de Vigo e a súa contorna, en colaboración coa Facultade de Ciencias Económicas e Empresariais. Con esta xornada ponse o broche de ouro ás actividades de formación que a fundación levou a cabo ao longo de todo o curso pasado nesta facultade e nas que participaron 65 estudantes do Programa de Simultaneidade de Administración e Dirección de Empresas e Dereito, e 24 dos graos en Economía e ADE. [+info](#).

UNHAS XORNADAS REIVINDICARÁN NO CAMPUS O PAPEL DA COMUNICACIÓN NA LOITA CONTRA A VIOLENCIA MACHISTA

DUVI PONTEVEDRA 10/10/2019



A xornada desenvolverase o xoves 24 de outubro na Facultade de Ciencias Sociais e da Comunicación.

Aprobado en 2017 no Congreso dos Deputados, o [Pacto de Estado contra a Violencia de Xénero](#) incide na crecente importancia dos medios de comunicación e dos contidos audiovisuais na configuración e interiorización do sexismo, así como na necesaria implicación das e os profesionais da comunicación na aplicación de boas prácticas en materia de violencia machista. Dar a coñecer a importancia do audiovisual nos procesos de socialización e transmisión de valores, analizar as dinámicas a través das que se constrúe o sexismo e pór sobre a mesa respostas profesionais que contribúan a garantir a protección dos dereitos das mulleres son os obxectivos centrais das xornadas. [+info](#).

Outubro 2019.



A cita será no Ifevi os vindeiros 22 e 23 de outubro.

AS EMPRESAS DO ÁMBITO BIOTECNOLÓXICO E XURÍDICO SOCIAL GAÑAN PESO NA 4ª EDICIÓN DA FINDE.U

D. BESADÍO DUVI 10/10/2019

A Feira Internacional de Emprego Universitario, Finde.U, chega este ano á súa cuarta edición convertida nun dos grandes referentes de intermediación laboral universitaria do noroeste peninsular. A cita será este ano os días 22 e 23 de outubro no Instituto Feiral de Vigo e o 29 e 30 en Exponor, Porto, e como principal novidade destaca a incorporación de empresas do ámbito biotecnolóxico, así como de firmas das áreas xurídica e social, artes e humanidades, que se suman as de carácter máis tecnolóxico, puntal principal desta feira. [+info](#).



A UNIVERSIDADE PREMIARÁ O ESFORZO DO ALUMNADO QUE OBTÉN BOS RESULTADOS DEPORTIVOS SEN DETRIMENTO DOS ACADÉMICOS

DUVI 10/10/2019

Recoñecer o mérito do alumnado que compatibiliza o deporte co estudo e obtén bos resultados. Este é o obxectivo dos premios anuais á Excelencia Deportiva que concede a Universidade de Vigo. Nesta undécima edición galardóarase aos catro alumnos cun mellor rendemento conxunto nos dous aspectos, a traxectoria deportiva e a vida académica, no curso 2018/2019. [+info](#).



Captura do inicio do vídeo "Camiño segura no campus de Vigo".

A UNIDADE DE IGUALDADE LANZA A CAMPAÑA CAMIÑO SEGURA

D. BESADÍO DUVI 11/10/2019

Coincidindo coa celebración do Día Internacional da Nena e baixo o lema xeral *A Igualdade está de festa*, a Unidade de Igualdade lanzou este venres unha nova campaña comunicativa na que, "con ton desenfadado, próximo e actual" tratará, a través da difusión de diferentes vídeos, de facer unha chamada á participación e á interacción da comunidade universitaria, priorizando sobre todo ao alumnado, sobre diferentes temáticas, incluíndo a seguridade nos espazos públicos e o uso axeitado e crítico de internet e as novas tecnoloxías. [+info](#).



COMO COMBATER OS ESTEREOTIPOS DE XÉNERO DESDE AS AULAS

DUVI PONTEVEDRA 14/10/2019

“Un neno ou nena de tres anos xa está marcado polos estereotipos de xénero”, salienta a docente do CEIP A Xunqueira 1 Carmen Quinteiro, que este mércores protagonizará un coloquio na Facultade de Ciencias da Educación e do Deporte, no que presentará unha serie de exemplos do traballo que desde hai cinco anos desenvolve nesta escola co propósito de combater os estereotipos e roles de xénero nas aulas de Educación Infantil e Educación Primaria. [+info.](#)



Antonio Vaamonde, Javier Roca, Abel Caballero e M^a José Caride, na presentación. Foto: Concello de Vigo.

O XIV CONGRESO GALEGO DE ESTATÍSTICA REUNIRÁ EN VIGO MÁIS DUN CENTENAR DE ESPECIALISTAS NACIONAIS E INTERNACIONAIS

D. BESADÍO DUVI 14/10/2019

Pese a ser unha cita a priori de carácter autonómico, o décimo cuarto Congreso Galego de Estatística e Investigación Operativa reunirá a vindeira semana en Vigo máis dun centenar de especialistas nacionais e internacionais. Así o explicaron este luns os profesores Javier Roca e Antonio Vaamonde na presentación oficial deste congreso celebrada no Concello de Vigo e á que tamén asistiu o alcalde, Abel Caballero, e a concelleira de Urbanismo, María José Caride. [+info.](#)



Apertura das xornadas no paraninfo do edificio Ernestina Otero..

ARRANCA A SEMANA DA AXENDA 2030 NA UVIGO, PANCA DE CAMBIO CARA UNHA SOCIEDADE MÁIS XUSTA E INCLUSIVA

D. BESADÍO DUVI 16/10/2019

Tres días de conferencias, obradoiros, concertos e actividades culturais con selo sostible. Este mércores arrancaron no campus de Vigo as *Xornadas sODStendo o planeta. Semana da Axenda 2030 na UVigo*, un amplo paraugas baixo o que se abrigan toda unha serie de actividades dirixidas a sensibilizar á comunidade universitaria, especialmente ao alumnado, sobre a importancia de situar o desenvolvemento sostible, e o que isto implica na protección do planeta e na procura de sociedades máis xustas e inclusivas, no centro da actividade diaria, tanto a nivel individual –cada un na súa propia axenda- como a nivel colectivo. [+info.](#)



A xornada contou coa intervención de tres especialistas do eido xurídico.

UNHA XORNADA AFONDA NA VULNERABILIDADE DA MULLER TRABALLADORA ANTE A DIXITALIZACIÓN

ROSA TEDÍN DUVI OURENSE 16/10/2019

A vulnerabilidade da muller traballadora ante a dixitalización do mercado laboral foi o tema central dunhas xornadas celebradas este mércores na Facultade de Dereito do campus de Ourense. Baixo o título *Precariedade da traballadora ante os empregos dixitais atípicos*, a cita reuniu a tres especialistas para expor algunha das claves dos retos que desde unha perspectiva de xénero afronta a muller ante a revolución tecnolóxica. [+info](#).



O acto celebrouse na Facultade de Dereito.

UN CURSO FORMA A XURISTAS E FUTUROS XURISTAS NO EIDO DA VIOLENCIA DE XÉNERO

ROSA TEDÍN DUVI OURENSE 17/10/2019

Desde este xoves e ata o 20 de novembro, a Facultade de Dereito do campus de Ourense acolle o curso *Violencia de xénero*, organizado polo Colexio da Avogacía de Ourense coa colaboración deste centro. Durante cinco sesións que se prolongarán ata o 20 de novembro desenvolverase un dilatado programa de intervencións no que especialistas de diferentes áreas afondarán en diversos aspectos relacionados con esta violencia, desde o cumprimento de sentencias ata o tratamento dos menores. [+info](#).



A alumna de Belas Artes Blanca Nieves Lourés foi unha das premiadas coas bolsas de Novos Valores.

A CREATIVIDADE DO ALUMNADO DE BELAS ARTES PROXÉCTASE NO MUSEO E NAS RÚAS

DUVI PONTEVEDRA 17/10/2019

Desde este xoves e ata o 17 de novembro poden verse no Sexto Edificio do Museo de Pontevedra os proxectos que as gañadoras e o gañador do certame Novos Valores 2018 desenvolveron ao abeiro das bolsas de creación artística concedidas pola Deputación. Entre eles, atópanse as creacións da alumna de doutoramento da Facultade de Belas Artes Blanca Nieves Lourés, xunto ás dos egresados Lois Búa e Natalia Umpiérrez e as de Noela Covelo. Por outra banda, os tamén alumnos de doutoramento da facultade Macarena Montesinos e Berio Molina levan a cabo nestes días unha serie de accións artísticas nas rúas da cidade, como parte do proxecto polo que foron seleccionados na convocatoria das Residencias Paraíso. [+info](#).



O #RETO5MIL CONSEGUE 4358 DOAZÓNS DE SANGUE NAS UNIVERSIDADES ESPAÑOLAS

DUVI 17/10/2019

A segunda edición do #Reto5mil superou o obxectivo marcado e, en concreto, foron 5305 as persoas que doaron o seu sangue na cita solidaria do pasado 8 de outubro. Non obstante, o número de doazóns foi de 4358, xa que por diferentes motivos, parte dos participantes nun cumprían os requisitos establecidos para poder doar. [+info](#).

10



Imaxe da benvida celebrada na antiga capela do campus.

AS AULAS DE TEATRO DO CAMPUS INICIAN A SÚA ACTIVIDADE

DUVI OURENSE 17/10/2019

Este mércores pola tarde as aulas de teatro do campus de Ourense iniciaron a súa actividade cun acto de benvida no que se deron cita o arredor de medio centenar de persoas que este cuadrimestre se inscribiron nelas. A formación, que se enmarca na programación de obradoiros do campus de Ourense, corre a cargo un ano máis da compañía Sarabela, sendo Fernando Dacosta o seu director. En total son catro os niveis que se imparten. [+info](#).



Foto de familia das autoridades cos premiados.

A UNIVERSIDADE RECOÑECE A ENXEÑERÍA SEN FRONTEIRAS E OS NINGUÉNS CO I PREMIO CONSELLO SOCIAL UVIGO-HUMANA

D. BESADÍO / M. DEL RÍO DUVI 18/10/2019

Pola súa contribución a crear un mundo máis comprometido, solidario e xusto, a Universidade de Vigo recoñeceu este venres á Asociación Enxeñería Sen Fronteiras Galicia e ao Foro socioeducativo Os Ninguéns co I Premio Consello Social UVigo-Humana, unha proposta nova no Sistema Universitario de Galicia co que a institución académica viguesa e o seu Consello Social pretenden reforzar a función social da universidade pública. [+info](#).



O campus acolleu a celebración da xornada a ciencia dos materiais con perspectiva de xénero.

A LOITA POLA IGUALDADE DE XÉNERO NA CIENCIA, UNHA CARREIRA DE FONDO

DUVI 18/10/2019

Co fin de dar a coñecer as liñas de investigación desenvolvidas por mulleres tanto dende a Universidade de Vigo como doutras institucións, a Unidade de Igualdade e o Centro de Investigacións Biomédicas (Cinbio) celebraron este venres unha xornada sobre a ciencia dos materiais con perspectiva de xénero. A finalidade é afondar nos traballos realizados por científicas en eidos relacionados cos ámbitos de coñecemento dos tres graos que se imparten as facultades que comparten o Edificio de Ciencias Experimentais: Química, Ciencias do Mar e Bioloxía, como explicaba a investigadora Verónica Salgueiriño, do Departamento de Física Aplicada.[+info](#).



Parte do alumnado estranxeiro no acto informativo que tivo lugar nas Xornadas de Benvida.

A UNIVERSIDADE ARRANCA O CURSO CON MÁIS DE 400 ESTUDANTES ESTRANXEIROS NAS SÚAS AULAS

DUVI 21/10/2019

Alemaña, Italia e Francia seguen a ser os países de procedencia maioritarios do alumando estranxeiro que recibe a Universidade de Vigo neste curso 2019-2020. Como cada ano, centos de alumnos e alumnas de diferentes puntos do mundo elixen Vigo, Ourense ou Pontevedra para completar a súa formación nun país alleo. Nesta ocasión, a UVigo dálle a benvida a 439 estudantes de intercambio, a maioría deles (325) no marco do programa Erasmus+.[+info](#).



As actividade levan varios anos celebrándose na Facultade de Dereito de Ourense.

TRES ACTIVIDADES PARA A REFLEXIÓN SOBRE O DEREITO E AS SÚAS INTERSECCIÓN COA IGUALDADE E A LITERATURA

DUVI OURENSE 21/10/2019

Tres espazos para a reflexión sobre o dereito e sobre e as súas interseccións coa igualdade e a literatura. Esta é a proposta varias actividades que se están a celebrar nas facultades de Dereito e Ciencias Xurídicas e do Traballo da Universidade de Vigo. Trátase do Seminario de Dereito e Literatura, as xornadas Feminismo e Teoría do Dereito e o ciclo de conferencias Pensar o Dereito. As tres desenvólvense no campus de Ourense desde hai varios anos baixo a dirección do catedrático Pablo Raúl Bonorino e este curso dan o salto tamén ao campus de Vigo.[+info](#).



O profesor do Departamento de Filoloxía Galega e Latina Burghard Baltrusch é o director da cátedra José Saramago.

AS SEIS CÁTEDRAS DEDICADAS A SARAMAGO CONSTITUIRÁNSE EN PONTEVEDRA NUNHA REDE INTERNACIONAL

EDUARDO MUÑOZ DUVI PONTEVEDRA 21/10/2019

Neste 2019, o campus de Pontevedra exercerá de novo como sede das xornadas coas que a Cátedra Internacional José Saramago (CJS) da Universidade de Vigo propón unha abordaxe multidisciplinar da figura e obra do Nóbél portugués. Entre o 2 e o 4 de decembro, desenvolveranse na sede da Vicerreitoría as IV Xornadas Internacionais José Saramago, que, baixo o título de *Saramago e os desafíos do noso tempo*, porán o foco no labor do escritor portugués “como activista político, como defensor incansable dos dereitos humanos, do ecoloxismo, da igualdade dos xéneros, das culturas minorizadas...”, salienta o director da CJS, o profesor Burghard Baltrusch. [+info](#).



A unidade instalouse no Pavillón Universitario.

O ALUMNADO DE FISIOTERAPIA PON EN PRÁCTICA OS SEUS COÑECEMENTOS NO MEDIO MARATÓN CIDADE DE PONTEVEDRA

DUVI PONTEVEDRA 21/10/2019

Con máis de 1500 corredores e corredoras inscritos, o Medio Maratón Cidade de Pontevedra, celebrado este domingo, contou un ano máis coa colaboración das unidades da Facultade de Fisioterapia. Once alumnos e alumnas deste centro do campus pontevedrés colaboraron co evento deportivo na unidade instalada no Pavillón Universitario, onde antes e despois da proba prestaron asistencia a máis de 60 participantes nesta carreira popular. [+info](#).



Alberto Vaquero entregando un dos diplomas.

18 EXEMPLOS DE QUE CALQUERA IDADE É BOA PARA ESTUDAR NA UNIVERSIDADE

DUVI OURENSE 21/10/2019

O campus de Ourense acolleu este venres o acto de graduación da XV promoción de tituladas e titulados universitarios sénior e a XIII promoción de tituladas e titulados superiores sénior do Programa Universitario de Maiores da Universidade de Vigo. No acto celebraron conxuntamente a consecución dos seus títulos 18 alumnas e alumnos dos campus de Vigo, Pontevedra e Ourense. As e os homenaxeados recolleron as súas bandas entre o aplauso dos membros da comunidade universitaria, familiares e amigos presentes. [+info](#).

Outubro 2019.



O Comité Ambiental do proxecto Green Campus aprobou o plan de acción para este curso.

MÁIS DE 70 MEDIDAS PARA FACER DE PONTEVEDRA UN CAMPUS MÁIS SUSTENTABLE

EDUARDO MUÑOZ DUVI PONTEVEDRA 23/10/2019

A instalación de paneis solares, a posta en marcha dun grupo de consumo de alimentos de proximidade ou a creación dunha horta ecolóxica son, xunto coa organización de xornadas e diferentes medidas de concienciación e de redución dos consumos, algunhas das propostas incluídas no plan de acción do proxecto Green Campus para o presente curso. O Comité Ambiental deste programa, que permitiu ao campus converterse no primeiro de España distinguido coa bandeira verde que outorga a Fundación for Environmental Education (FEE), celebrou este mércores na Vicerreitoría a xuntanza na que se debateu e aprobou esta folla de ruta, integrada por máis de 70 accións. [+info](#).

13



Imaxe do grupo das e dos participantes.

ESPECIALISTAS INTERNACIONAIS AFONDAN NO EQUILIBRIO ENTRE SERVIZOS SANITARIOS E GASTO PÚBLICO

DUVI OURENSE 23/10/2019

Unha vintena de especialistas europeos en economía da saúde reúnen este mércores e xoves na sede do Consello Económico e Social, en Santiago de Compostela, nunha conferencia internacional sobre gasto público sanitario organizada polo grupo de investigación GEN (Governance and Economics Research Network), que ten a súa sede na Facultade de Ciencias Empresariais e Turismo do campus de Ourense. [+info](#).



"Apeiron", de Angeles Brea é unha das 45 obras que se proxectan neste festival.

O FESTIVAL INTERSECCIÓN DEDICA UNHA RETROSPECTIVA Á FACULTADE DE BELAS ARTES

DUVI PONTEVEDRA 23/10/2019

Un total de 45 pezas de videoarte, que son tamén traballos académicos realizados polo alumnado da Facultade de Belas Artes ao longo de 26 anos, forman parte do programa do [Festival de Arte Audiovisual Contemporánea Intersección](#), que a partir deste xoves 24 celébrase na Fundación Luís Seoane da Coruña. Cunha programación centrada en obras audiovisuais que se sitúan no cruce entre a arte contemporánea e o cinema de vangarda, o festival dedica na súa segunda edición unha [retrospectiva](#) á facultade do campus pontevedrés, que coordinaron os docentes do centro Sol Alonso e Xoán Anleo. [+info](#).

Outubro 2019.



Intervención do reitor, Manuel Reigosa, durante a inauguración da feira.

ARRANCA A FINDE.U CON MÁIS DE MEDIO MILLEIRO DE PARTICIPANTES

D. BESADÍO DUVI 22/10/2019

Máis de medio milleiro de persoas inscritas e medio cento de empresas participantes. Estas son as cifras coas que este martes arrancou nas instalacións do Instituto Feiral de Vigo, Ifevi, a 4ª edición da Feira Internacional de Empleo Universitario Finde.U, un evento aberto á participación de todo o alumnado e exalumnado das máis variadas áreas de formación e co que se pretende facilitarlles a busca e selección das empresas e organizacións que máis se adecúen ás súas perspectivas de traballo e interese profesionais, así como darlles a coñecer as competencias máis valoradas na actualidade polas entidades empregadoras. [+info](#).

14



A OPI presentouse hoxe á comunidade universitaria.

UNHA OFICINA PARA FOMENTAR A PARTICIPACIÓN DA COMUNIDADE UNIVERSITARIA NO DESENVOLVEMENTO DE PROXECTOS INTERNACIONAIS INNOVADORES

M^a DEL CAMEN ECHEVARRÍA DUVI 22/10/2019

A necesidade de centralizar e homoxeneizar os procesos de solicitude, xestión e xustificación dos proxectos internacionais, derivada da gran variabilidade que se produce nas convocatorias de proxectos internacionais, está na orixe da creación da Oficina de Proxectos Internacionais (OPI) da Universidade de Vigo. Calquera investigadora ou investigador da institución académica viguesa pode solicitar os servizos da oficina. [+info](#).



Parte do alumnado participante xunto coa directora da Unidade de Igualdade e a profesora Mar Caldas.

21 IMAXES PARA REFLEXIONAR SOBRE A ORDE SEXUAL IMPOSTA

DUVI 22/10/2019

Sen moldes, sen tabús, sen xéneros preestablecidas, sen prexuízos e sen imposicións tradicionais. 17 estudantes de Belas Artes propoñen cadansúa visión sobre o xénero a través de imaxes que tratan de “rachar coa orde sexual imposta”. A través de 21 fotografías conforman a nova edición da exposición *Sen Moldes*, unha iniciativa que naceu hai tres anos e que está coordinada polos profesores Mar Caldas e Andrés Pinal. [+info](#).

Outubro 2019.



As xornadas celebráronse na sala 1 do Edificio Miralles.

AS ENXEÑEIRAS DE MINAS E DA ENERXÍA RETRATAN NUNHAS XORNADAS COMO É O SEU DÍA A DÍA NA PROFESIÓN

D. BESADÍO DUVI 25/10/2019

Catro mulleres coas que representar o ámbito profesional actual da enxeñaría de minas: unhas que traballan en organismos públicos, outras en empresas privadas; unhas que levan máis de 25 anos exercendo a súa profesión, outras que se incorporaron máis recentemente; algunhas que desenvolven o seu labor profesional no ámbito local e outras no estranxeiro; con diferentes niveis de responsabilidade na súa actividade e que traballan ou traballaron en diferentes departamentos (producción, mantemento, calidade, xestión, enxeñaría...). [+info.](#)



O reitor, Manuel Reigosa, reuniuse hoxe con María Dolores Fernández.

VIGO SÚMASE Á INICIATIVA DA VALEDORÍA DO POBO DE CONVOCAR UN PREMIO SOBRE IGUALDADE DE XÉNERO NOS TFG E TFM

M^a DEL CARMEN ECHEVARRÍA DUVI 25/10/2019

O reitor da Universidade de Vigo, Manuel Reigosa, reuniuse este venres coa valedora do pobo, María Dolores Fernández, no primeiro encontro tralo recente nomeamento da responsable da Valedoría. No encontro, Reigosa confirmou a adhesión da Universidade de Vigo á iniciativa da institución que dirixe María Dolores Fernández e na que tamén participarán as universidades de Santiago de Compostela e A Coruña, de convocar un premio sobre igualdade de xénero nos traballos de fin de grao (TFG) e fin de mestrado (TFM). [+info.](#)



A entrega de premios da pasada edición.

ACELERADORAS SECTORIAIS DOS ÁMBITOS DA AUTOMOCIÓN, AERONÁUTICO E ALIMENTARIO COLABORAN POR PRIMEIRA VEZ COS PREMIOS INCUVI-EMPRENDE

DUVI 25/10/2019

Tres aceleradoras de carácter sectorial especializadas nos ámbitos da automoción (BFAuto), aeronáutico e de vehículos non tripulados (BFAereo) e alimentario (BFFood) colaborarán por primeira vez cos [premios Incuvi-Emprende](#). O programa de preincubación da Universidade de Vigo, ao que ata hoxe pode concorrer o alumnado matriculado na Universidade de Vigo en estudos de grao e mestrado no curso 2019/2020 e persoas tituladas en estudos oficiais da universidade no curso 2016/2017 e posteriores, incorpora nesta edición unha colaboración coas aceleradoras. [+info.](#)



Ciencias Sociais e da Comunicación acolle as xornadas “comunicación, igualdade e violencia contra as mulleres”.

UNHAS XORNADAS REIVINDICAN UNHA POSTURA BELIXERANTE DOS MEDIOS CONTRA A VIOLENCIA MACHISTA

EDUARDO MUÑOZ DUVI PONTEVEDRA 24/10/2019

Preto do 90% da ficción audiovisual ten a homes como protagonistas, que son tamén os asinantes do 85% dos artigos de opinión publicados o pasado ano nos principais xornais galegos e ocupan o 75% dos postos directivos nas principais empresas de comunicación españolas. Estas son algunhas das cifras que este xoves puxeron sobre a mesa as e os participantes nas xornadas *Comunicación, igualdade e violencia contra as mulleres*, dirixidas a pór o foco na importancia do audiovisual na de transmisión de valores e no importante papel dos medios na loita contra a violencia contra as mulleres. [+info](#).



María Isabel Doval, Manuel Baltar e Esther de Blas.

130 ESPECIALISTAS DE ONCE PAÍSES PARTICIPARÁN NO OURENSE RURAL SUMMIT

DUVI OURENSE 24/10/2019

Tres días para a análise, o debate e a proposta de ideas, 130 participantes tanto do eido público coma privado de máis dunha decena de países e o obxectivo de marcar a folia de ruta do International Observatory of Rural Research de Ourense e contribuír ao desenvolvemento rural. Con estas cifras e estes obxectivos presentouse este xoves o *Ourense Rural Summit*, cita organizada pola Universidade de Vigo en colaboración coa Deputación Provincial que terá lugar do 28 ao 31 de outubro nos mosteiros de Santo Estevo e de Oseira. [+info](#).



A mostra está integrada por reproducións de fotografías, documentos e películas e fontes históricas.

UNHA MOSTRA RECUPERA NA FFT A MEMORIA DAS PIONEIRAS DA INTERPRETACIÓN DA PRIMEIRA METADE DO SÉCULO XX

Mª DEL CAMEN ECHEVARRÍA DUVI 24/10/2019

Aínda que a presenza das mulleres nos labores de interpretación ten representantes anteriores ao século XX, é a partir sobre todo do ano 1950, coa consolidación da profesión, que se rexistra unha crecente feminización desta actividade. “A historiografía convencional ocupouse pouco dos intérpretes e aínda menos das intérpretes, así que nos pareceu acaído co gallo do I Congreso Internacional *Traducción y sostenibilidad cultural: sustrato, fundamentos y aplicaciones*, celebrado en Salamanca o ano pasado, poñer de relevo o papel da muller na protohistoria da profesión de intérprete”, explica Jesús Baigorri, docente da USAL e xunto a Crispulo Travieso e Cristina Zelich, comisario da exposición *Intérpretes pioneras (1900-1953): deitando pontes*. [+info](#).



Imaxe xeral do salón de actos da Facultade de Filoloxía e Tradución durante a conferencia.

CINE INCLUSIVO E LECTURA FÁCIL, EIXES BÁSICOS PARA MELLORAR A ACCESIBILIDADE DOS CONTIDOS CULTURAIS

D. BESADÍO DUVI 24/10/2019

O alumnado da Facultade de Filoloxía e Tradución tivo este xoves a oportunidade de pórse ao día sobre as mellores maneiras de facer cine inclusivo e contidos literarios que poidan etiquetarse como de ‘Lectura Fácil’, termo acuñado para denominar as obras creadas ex profeso para achegar a lectura a persoas con necesidades especiais. Fixérono da man do experto en audiodescripción Antonio Vázquez, cuxa produtora, Aristia, traballa para a ONCE. [+info](#).

17



Imaxe de grupo das e dos asistentes á clausula e ao encontro.

SETE PUNTOS PARA MARCAR UNHA ESTRATEXIA DE FUTURO PARA O RURAL

DUVI OURENSE 31/10/2019

Despois de tres días de intensa actividade, o [Ourense Rural Summit](#), iniciativa organizada pola Universidade de Vigo e a Deputación Provincial de Ourense, pechouse este xoves coa sinatura por parte dos seus participantes da Declaración de Santo Estevo de Ribas de Sil por unha Axenda Rural Europea. Nela márcase unha folla de ruta de sete puntos para o International Observatory of Rural Research, promovido polas dúas institucións, recalcando como “o impulso dos territorios rurais é clave para o futuro da economía, a sociedade e o medio”. [+info](#).



O PROFESORADO BUSCARÁ NUN CURSO NOVAS IDEAS PARA INCORPORAR AS CUESTIÓNS DE XÉNERO ÁS CLASES

DUVI 31/10/2019

Novas ideas para introducir nas clases e nos laboratorios as cuestións relacionadas coa igualdade, isto é o que ofrece o curso *Incorporación do xénero na docencia universitaria e na transferencia de coñecemento*, unha actividade coorganizada pola Vicerreitoría de Investigación e a Área de Formación e Innovación Educativa e que se insire dentro do Programa de Formación Permanente do PDI da Universidade de Vigo para o ano 2019. [+info](#).



Con este relatorio péchase o ciclo
Mulleres Economistas...sen límites..

AS CAUSAS DA FENDA DE XÉNERO, MÁIS ALÓ DA MATERNIDADE

DUVI 30/10/2019

Se ben a maternidade é posiblemente o principal factor causante da fenda de xénero, tanto salarial como de promoción, existen outras circunstancias que se agochan tras este freo ao desenvolvemento profesional das mulleres. A algunhas delas referiuse Laura Hospido, xefa da Unidade de Análise Microeconómica do Banco de España, que este mércores pechou o ciclo *Mulleres Economistas... sen límites* que se vén celebrando estas últimas semanas na Facultade de Ciencias Económicas e Empresariais. [+info](#).

UNIVERSIDADE DE VIGO

Unidade de Análisis e Programas.

Edificio Filomena Dato.

Planta Baixa.

36310 Vigo (Pontevedra)

986.818.689 986.818.640